

# Ngā Tikanga Aromatawai Paerewa Paetae

---

## On this page

[Kaupae 2 Te Reo Rangatira 2019](#) ▼

## Kaupae 2 Te Reo Rangatira 2019

---

Ngā Tikanga Aromatawai Paerewa  
Paetae [91777](#) [91779](#) [91780](#)

## Wāhanga A: He kōrero whakataki

Katahi rā te pai o te whakatautau nei. Kāore i uaua, ā, kāore hoki i māmā rawa. Ka mutu, he rawe ngā kaupapa i whakawhārikihia hei whakatewhatewha mā ngā taurira.

# Wāhanga E: Pū rongo mo ngā Paerewa Paetae

## 91777: Te whakarongo ki ngā tohunga reo

Ko ngā ākonga i whakawhiwhia ki te **Paetae**:

- kāore i kaha ki te whakamārama i ā rātou whakautu
- heoi anō, i rere te reo Māori
- i whai hoki i te wairua o te pātai.

Ko ngā ākonga i whakawhiwhia ki te **Kāore i whiwhi**:

- kāore i whakautu i ngā pātai katoa
- kāore i mārama ki te uho o ngā korero
- kāore rānei i whai i te wairua o te pātai.

Ko ngā ākonga i whakawhiwhia ki te **Kaiaka**:

- e kaha noa atu ana te rere o te reo Māori
- ka kaha te arohaehae i ngā tikanga peha i roto i ngā korero a te tohunga reo
- ka tīkina atu he taunakitanga hei āpiti atu ki ngā whakamahukitanga
- i mārama pū ki tā rātou i rongoi ai me te hāngai o te whakautu
- ka kaha te whakaō atu ki tā te kaikōrero e whakapuaki ana.

Ko ngā ākonga i whakawhiwhia ki te **Kairangi**:

- ka eke anō te taumata o te reo me te hua mai o te whakaaro Māori
  - ka kaha noa atu te arohaehae i ngā tikanga peha i roto i ngā korero a te tohunga reo
  - ka kitea tana kaha nanao atu ki ngā momo taunakitanga
  - ka nanakia te whakaō atu ki tā te kaikōrero e whakapuaki ana.
- 
- 

## 91779: Te Pānui i te tuhinga tawhito

Ko ngā ākonga i whakawhiwhia ki te **Paetae**:

- e rere ana te reo Māori
- i ētehi wā he nukanuka hora reo i whakamahia
- i mārāma ki tā rātou i pānui ai
- i whakaō atu ki te wairua o te tuhinga.

Ko ngā ākonga i whakawhiwhia ki te **Kāore i whiwhi**:

- kāore i whakautu i ngā pātai katoa
- kāore i mārāma ki te uho o ngā korero
- he whāiti te reo, he whāiti anō hoki ngā whakaaro.

Ko ngā ākonga i whakawhiwhia ki te **Kaiaka**:

- e kaha noa atu ana te rere o te reo Māori
- i kaha kitea te mārama ki te uho o ngā kōrero
- ka tīkina atu he taunakitanga hei āpiti atu ki ngā whakamahukitanga
- i mārama pū ki tā rātou i pānui ai me te hāngai o te whakautu
- ka kaha te whakaō atu ki tā te tuhinga e whakapuaki ana.

Ko ngā ākonga i whakawhiwhia ki te **Kairangi**:

- ka kounga kē atu te taumata o te reo
- he mea tiki atu i ngā momo wheako hei taunaki i te whakaaro
- ka nanakia te nanao atu ki ngā momo taunakitanga
- ka tutuki katoa ngā hiahia o ia pātai ki tētehi taumata tiketike
- ka nanakia te whakaō atu ki tā te kaituhi e whakapuaki ana
- inā te rere o ngā nuka hora reo.

### **Kupu āpiti**

Ko tētehi āhukatanga i kaha kitea ko te kore mōhio o te tokomaha ki tēnei mea te kupu whakarite. E hāngai ana te kōrero nei ki te pātai tuatoru o te whakamātautau nei, ā, ko tā te tokomaha he whakamārama i te kupu 'whakarite' me tōna kotahi. Inā hoki, i tere kitea te taumata mēnā rānei he paetae, he kaiaka, he kairangi rānei. Heoi anō, e mihi ana ki tēnei o ngā

whakamātautau e whāngai tonu nei i te ahi o ngā kōrero tuku iho hei whakamahana, hei aro nui atu mā te hunga rangatahi.

---

## 91780: Te tuhi kōrero whakaae rānei, whakahē rānei

Ko ngā ākonga i whakawhiwhia ki te **Paetae**:

- e Māori ana te rere o te reo
- e Māori ana te āhua o ngā whakaaro
- i arohaehae ki tā te wairua o ngā kōrero
- i kitea te uho o ngā whakaaro, heoi inā ngā kōrero ka taea
- i kitea te whakāe, te whakahē me ētahi taunakitanga.

Ko ngā ākonga i whakawhiwhia ki te **Kāore i whiwhi**:

- kāore ngā tuhinga i te whakaae, i te whakahē rānei, ā, he tuhituhinga noa nei
- he moroiti nō ngā tuhinga
- kīhai i arohaehae, i whakamahuki i ngā kōrero a te kaikōrero
- i uaua ki te pānui i a rātou tuhinga kia mārama ai ki te ngako o te kōrero.

Ko ngā ākonga i whakawhiwhia ki te **Kaiaka**:

- e kaha noa atu ana te rere o te reo Māori; i Māori, i kounga ngā whakaaro
- i kitea te whakaae, te whakahē me ngā taunakitanga

- i āta arohaehae ki tā te wairua o ngā kōrero
- e kaha rere ana ngā nukanuka hora reo.

Ko ngā ākonga i whakawhiwhia ki te **Kairangi**:

- ka eke anō te taumata o te reo me te whakaaro Māori
- i Māori, i motuhake, ka mutu, i kounga ngā whakaaro
- ka nanakia noa atu te arohaehae ki tā te wairua o ngā kōrero
- i tere kitea te whakaae, te whakahē
- i nanakia te taunaki i te whakaaro me te nanao atu ki ngā momo kaupapa hei tohe i te kaupapa
- rere pai ana ngā nukanuka hora reo.

### **Kupu āpiti**

E rua ngā tuhinga i tēnei whakamātautau. Ko te tikanga ia me whakautu tētahi anake. Kei reira tonu te hunga tē aro mai ki ngā tohutohu.

Mō te hunga kāore anō kia eke panuku, ko te mea kē kia kaua e tāruarua noatia ngā kupu o te rauemi pānui. Engari, me whakarite whakamāramatanga i āna ake kupu.

## **[Te Reo Rangatira subject page](#)**

### **Previous years' reports**

[2018 \(PDF, 111KB\)](#), [2017 \(PDF, 40KB\)](#), [2016 \(PDF, 205KB\)](#)

